



Komunikadu Imprensa
Tribunál Judisiál Primeira Instánsia Baukau
08 Novembru 2024

Tribunál Judisiál Primeira Instánsia Baukau kondena pena efetiva tinan 2 ba arguidu kazu maus-tratus ba kónjuje

Iha 07 Novembru 2024, Tribunál Judisiál Primeira Instánsia Baukau prezide julgamentu leitura akordaun ba krime maus-tratus ba kónjuje ne'ebé envolve arguidu AdSF hasoru nia feen, iha Munisípiu Baukau.

“JSMP apresia desizaun kazu ne'e, tanbá tribunál manifesta nia sensibilidade ba krime sira ho natureza violénsia bazeia ba jéneru no desizaun ne'e bele sai hanesan edukasaun ida ba sosiedade atu hakotu korente violénsia iha sosiedade,” dehan Sr. Casimiro dos Santos, Diretór Ezekutivu interinu JSMP.

Prokuradór akuza katak iha 09 Janeiru 2021, iha oras tuku 12:00 meiodia, arguidu tuku dala tolu iha ofendida nia kotuk laran no tuku tan dala rua kona iha ofendida nia hirus matan. Kazu ne'e akontese bainhira mosu haksasuk malu entre arguidu ho ofendida kona-ba ofendida haruka arguidu ba hamos sira nia to'os maibé arguidu hatan dehan moras no la ba, maibé derepente ba fali hamos feen primeiru nia to'os.

Iha 13 Janeiru 2021, iha oras tuku 03:00 madrugada ofendida toba hela iha uma laran derepente arguidu sidi no arguidu nia ain kona ofendida nia isin halo ofendida hadeer no haree arguidu kaer ho besi kanu ida no hamrik iha ofendida nia oin. Aktu ne'e halo ofendida ta'uk nune'e ofendida tenta hadau tiha besi kanu refere maibé la konsege, ofendida halai ses-an hosi arguidu maibé arguidu kaer tiha ofendida nia kalsa/kolu sai tiha nune'e ofendida halai sai ho roupa-laran de'it.

Prokuradór akuza arguidu kontra artigu 154 KP kona-ba maus-tratus ba konjuje ho moldura penál tinan 2 to'o tinan 6 konjuga ho artigu 2, 3(b), 35(a) no 36 LKVD.

Iha julgamentu arguidu konfesa parsial katak faktu akontese iha 09 Janeiru 2021 ne'e loos hotu. Maibé faktu ida akontese iha 13 Janeiru 2021 ne'e arguidu nega katak nia la iha kuñesementu no la halo problema ruma hasoru ofendida.

Entretantu ofendida kontinua konfirma hotu faktu sira iha akuzasaun no ofendida deklarara tan katak kazu ne'ebé arguidu halo hasoru ba ofendida ne'e, dala tolu ka dala haat ona no ofendida apresenta hotu ba prokuradór maibé ofendida haluha ona balu. Ho akontesimentu sira ne'e, iha tinan 2022, ofendida diside moris separa ona ho arguidu to'o agora.

Iha avaliasaun ba faktu sira hotu, tribunál prova katak provadu iha 09 Janeiro 2021, iha oras tuku 12:00 meiodia, arguidu tuku dala tolu iha ofendida nia kotuk laran no tuku tan dala rua kona iha ofendida nia hirus matan.

Tribunál mós prova faktu sira ne'ebé akontese iha 13 Janeiro 2021, iha oras tuku 03:00 madrugada, kona-ba arguidu sidi no hamrik kaer ho besi kanu ida iha ofendida nia oin, no dada-sai ofendida ninia roupa-laran no halai sai ba liur ho roupa-laran deit.

Alende ne'e tribunál mós relembra faktu akontesimentu sira antes katak arguidu envolve iha krime lubuk ida hasoru ofendida – no krime ne'ebé rejistra ho Nú. Prosesu: 0077/19.BCBCV kondena ho pena multa no krime ho Nú. Prosesu: 0173/19.BCBCV kondena ho pena prizaun fulan 3 suspende ba tinan 1 fulan 6 no krime ida ho Nú. Prosesu: 0038/22.BCBCV kondena ho pena efetiva tinan 1 iha prizaun.

Bazeia ba faktu provadu sira no tetu mós sirkunstánsia hotu-hotu ne'ebé haleu krime ne'e, tribunál konklui kondena arguidu ho pena prizaun tinan 2.

Desizaun ne'e hatudu avansu pozitivu iha setór justisa no JSMP fiar katak tribunál iha papél importante atu asegura protesaun liu-liu violénsia hasoru feto. Desizaun ne'e, sai lisaun ba membru comunidade sira atu hado'ok-an hosi violénsia doméstika.

JSMP fiar desizaun ne'e nu'udar pasu progresivu ida no sai referénsia di'ak ba tribunál seluk atu asegura protesaun adekuaudu ba feto sira liuhosi sentensa ne'ebé tribunál aplika. Tribunál hotu tenke asegura katak desizaun ne'ebé aplika ba kondenadu sira tenke iha efeitu ba prevensaun krime violénsia doméstika no violénsia bazeia ba jéneru iha futuru.

Kazu ne'e rejista iha tribunál ho Nú. Prosesu:0012/21.BCBCV. Julgamentu leitura akordaun ne'e prezide hosi juis kolektivu Dra. Sribuana da Costa, enkuantu Prokuradór representa hosi Dr. Bartolomeu de Araújo no arguidu hetan defeza hosi Dr. Sidónio Maria Sarmento hosi Defensória Públiku.

Atu hetan informasaun kompletu favor kontaktu:

Casimiro dos Santos
Diretór Ezekutivu Interinu JSMP
Diresaun e-mail: casimiro@jsmp.tl
Telefone: (+670) 33238883/77257466
Website: <https://jsmp.tl>
info@jsmp.tl